

四庫全書

集部

欽定四庫全書

集部

高子遺書卷七

詳校官中書

臣葉元符

侍讀

臣孫球覆勘

總校官進士

臣繆琪

校對官助教

臣羅萬選

謄錄監生

臣李玠

欽定四庫全書

高子遺書卷七

明 高攀龍 撰

疏

崇正學闢異說疏

萬曆二十年為行
人上得旨允行

臣惟自古治天下者未有不以教化為先務而教化之
汙隆則學術之邪正為之所係非小也是以聖帝明王
必務表章正學使天下曉然知所趨截然有所守而後
上無異教下無異習道德可一風俗可同賢才出而治

化昌矣臣見四川僉事張世則一本大略自謂讀大學古本而有悟知程朱誤人之甚謂朱熹之學專務尚博不能誠意成宋一代之風俗議論多而成功少天下卒於委靡而不振於是以前所著大學初義上獻欲施行天下一改章句之舊臣惟自昔儒者說經不能無異同而是非不容有乖謬是非謬則萬事謬矣以程朱大賢謂其學曰不能誠意謂其教曰誤人之甚是耶非耶議之於私家猶為一人之偏說而於聖賢無損鳴之於大廷

則遂足以亂天下之觀聽而於世教有害臣有不容已於言者矣夫自孟子歿而孔子之學無傳千四百年而始有宋儒周敦頤程顥程頤張載朱熹得其正傳而絕學復續學者始知所從入之途其功罔極矣然是五賢者生於宋而宋不能用其學之萬一前則章惇蔡京之徒斥之為奸黨後則韓侂胄之徒斥之為偽學貶逐禁錮以迄於亡恭惟我太祖高皇帝天縱神聖作民君師即位之初首立太學拜許存仁為祭酒以司教化存仁

為先儒許謙之孫謙承朱熹正學而存仁承上命以為教一宗朱氏之學令學者非五經四書不讀非濂洛關閩之學不講而天下翕然向風矣我成祖文皇帝益張而大之命儒臣輯五經四書大全而傳註一以濂洛關閩為主自漢儒以下取其同而刪其異別以諸儒之書類為性理全書同頒布天下永樂二年饒州儒士朱友季詣闕獻所著書專詆毀周程張朱之說上覽而怒曰此儒之賊也特遣行人押友季還饒州令有司聲罪杖

遣悉焚其所著書曰毋誤後人於是邪說屏息吾道中
天矣迨今二百餘年以來庠序之所教制科之所取一
稟於是學者幼而讀之老而不知一言為可用者固多
然而真儒如薛瑄胡居仁吳與弼陳真晟曹端羅倫莊
景章懋張元禎陳茂烈蔡清陳獻章王守仁諸人彬彬
盛矣至一代之風俗上有紀綱下重名節當變故之秋
率多仗義死節之士值權奸之際不乏敢言直諫之臣
賢士大夫之公評士庶之清議是非井然一有不當於

人心羣起而議其後故至於今上下相維持非祖宗教
育之明驗與不意今日乃有如世則肆然斥之曰誤人
曰不誠欲變祖宗表章之至意率天下而盡背之也即
世則所論程朱之學亦可謂不得其門者矣夫程朱之
學其始終條理之全下學上達之妙固未易言語形容
然其大要則不出涵養用敬進學在致知二語此非程
朱之教也孔子之教也故窮理即博文之謂也居敬即
約禮之謂也非孔子之教也堯舜之教也故博文即惟

精之謂也約禮即惟一之謂也二者合一並進而主敬為本故理日明瑩則心日靜虛動直而初非溺於詞章心益定靜則理益資深逢原而初不流於空寂此聖學所以允執其中也至大學一書程子所揭為初學入德之門而章句之作則朱子所為一生竭盡精力之筆後人學未造其域豈容輕議况古書皆有錯簡古本安可盡信世則之言誠意是矣豈諸儒獨不教人誠意乎誠者聖人之本學之所以成始成終功先格致正所以誠

正也意有不誠心有不正即非所以為格致也若夫溺於記誦徇外忘本此俗學所以為陋豈大學格致之教哉夫孔子之道至程朱而闡明殆盡學孔子而必由程朱正如入室而必由戶世之學者誠能虛心涵泳切己體察毋務新奇而先以一己之私意主張於前毋務立說而取聖賢之言矯揉為己之用循循焉以周程張朱為四書之階梯以四書為五經之階梯自得之而道可幾矣故善學者默而識之不言而信述而不作心逸日休

况今天下不患無論說而患無躬行就聖賢已明之道誠心而力行則事半而功倍矣何必嘵嘵焉必務自用智欲伸其一己之說為也世則又以宋之不振歸咎於諸儒之學噫是何言也人主不能用其道難以孔子之聖生於魯而不能救魯之衰微何疑於諸儒宋之亡也由前而言則壞於新法由後而言則壞於和議今不咎王安石呂惠卿蔡京章惇黃潛善汪伯彥秦檜韓侂胄之徒而咎諸儒之學何心哉夫所謂議論多而成功

少者非言者之罪而用言者之罪也自古芻蕘獻說工
瞽陳規其議論豈不至多然而上之人善於用中則片
言可折而盈廷可廢天下見事功之實而不見議論之
虛上之人漫無可否則人持所見而邪正雜陳徒滋耳
目之煩無補經綸之實耳豈以人人緘默而後為盛世
乎世則又謂本朝持衡國是者無決斷之勇分猷庶職
者有模稜之風庠序無真才實學之士朝廷鮮實心任
事之臣此信有之正不學之故也奈何反以咎程朱之

學也抑臣有深憂焉自世廟以前雖有訓詁詞章之習而天下多實學自穆廟以來率多玲瓏虛幻之談而弊不知所終笑宋儒之拙而規矩繩墨脫落無存以頓悟為工而巧變圓融不可方物故今高明之士半已為佛老之徒然猶知儒之為尊必藉假儒文釋援釋入儒者內有秉彝之良外有惟皇之制也而其隱衷真志則皆借孔孟為文飾與程朱為仇敵矣故今日對病之藥正在扶持程朱之學深嚴二氏之防而後孔孟之學明使

世則之言一倡天下之棄其仇敵也不啻芻狗焉於是人人自逞其私淫辭充塞正路榛蕪將二祖列宗之教蕩然掃地矣伏願陛下皇建有極端本化人身體孔孟之微言首崇程朱之正學必親經書以窮理必收放心以居敬朝乾夕惕省察克治思天之所與人而人之所受於天惟有仁義禮智四者人君為天子必克完天之賦予而後永膺天之眷命一念之發一事之動審其果合於仁合於義合於禮合於智則務擴而充之力而

行之審其有不合者則務遏而勿思禁而勿行如是日新又新純為天德則萬化之源清萬幾次第畢舉聖主之精神一奮天下之意氣維新矣於是體二祖之意振正學於陵夷廢墜之餘明詔中外非四書五經不讀而不得浸淫於佛老之說非濂洛關閩之學不講而不得淆亂以新奇之談學無分門士無異習人心貞一教化大同如是而人才不出政治不隆者從古以來未之有也臣入仕之初適見世則之疏不勝私憂隱慮遂有此

論辨或曰四方多事何暇為此清談臣謂不然此天下之大本古今之命脈危微之別毫釐千里之差千聖兢兢於此而可以細故視之哉故不避僭越之嫌迂濶之誚冒昧上陳伏乞聖明采擇

今日第一要務疏

萬曆二十年為行人工留中

臣觀今天下事勢岌岌強敵既為門庭之患而倭賊復為堂奧之災人情詢詢識者寒心所幸者紀綱未盡壞人心尚在離合之間誠得其要而圖之則天心感格

民心悅懌元氣一復神氣即振而天下可措於泰山之
安故不敢瑣賾特揭其至要者二端上聞一曰天下之
大本臣聞天下之事有本有末正其本者雖若迂緩而
實易為力救其末者雖若切至而實難為功所謂天下
之本者何陛下之心是也人君之心與天為一呼吸相
通一念而善天以善應之一念不善天以不善應之如
影之隨形纖悉不爽是以古之聖王終日乾乾操存此
心以對越在天故曰昊天曰明及爾出王昊天曰旦及

爾游衍蓋自朝及夕出王游衍無息不與天相對故天
理流行人欲屏息而能常凝帝眷於無聲無臭之表然
人心至活倏忽之間起滅萬狀未有無所事事而能懸
空守之者故必觀經書以求聖賢存心養性之道或觀
史鑑以求古今治亂興亡之原君子小人立心行事之
別又必時召侍臣相與講說討論以求治國平天下之
要如是則一日之間此心常止於義理人欲不得而乘
之心有所止則靜心靜則氣和氣和則喜怒皆中節而

刑罰不過其則聖心沖然和平聖體泰然安舒而後天地之和應之七政循軌雨暘時若萬物茂盛百姓阜成所謂篤恭而天下平蓋自然之實理也我太祖高皇帝曰人心虛靈乘氣機出入操而存之為難成祖文皇帝曰人君不可有所好樂流而不返則欲必勝理朕每退朝未嘗不思管束此心為切要此二祖所以遠紹堯舜精一之傳而聖子神孫所當萬世佩服者也臣少伏草茅側聞陛下憂天時亢旱布袍步行禱雨陛下此心何

心也畏天命悲人窮惻然不能自寧故屈萬乘之尊為
步行之勞而不憚也然而靈雨隨車天心格矣當其時
臣見雖山童田叟莫不舉手加額歡欣鼓舞謂聖天子
舉動為萬代瞻仰是人心格矣陛下一舉而天人交格
如此孰謂蒼蒼者不可知而林林總總者不易化乎伏
願陛下常提此心保而勿失擴而充之每事皆然陛下
今日如此即今日之堯舜也明日如此即明日之堯舜
也堯舜之道至易至簡言之似迂闊而行之實無難故

雖為山九仞苟一念怠荒即前功盡棄也雖未覆一簣苟一念精進為之即是也陛下何憚而不為堯舜使聖德光於海隅休聲傳於萬世乎此為天下之大本伏惟聖明留意臣愚不勝惓惓二曰天下之大機臣聞天下之事必有其機事機一握則百年之業可底成於一朝兆庶之情能轉移於俄頃何則機者神化之樞得其機而化斯神也臣觀今日內而百官外而萬姓所引領望於陛下其最急者曰除刑戮舉朝講用諫臣發內帑是四

者陛下為之易如反掌然而天下臣民所注向忽快觀於一朝如飢者之得食渴者之得飲觀聽遽新精神頓聳天下之事無不可為矣夫上帝以生物為心天子以天心為心豈以仁聖如陛下而獨不然乎臣固知必左右使令之人懾於天威而舉動失措故益動天怒而刑責太過耳夫不安則傾人極則變理之常也豈以睿知如陛下不慮此乎臣以為慮之亦無益也反之固甚易也陛下誠自今日開誠諭之許以更始盡除刑戮將見

人心悅服皆如再生聖主推心置人腹而左右傾心戴一人上下相安永無意外之變豈非挽回天心奠安宗社之至計乎特在陛下一念轉移間耳所謂舉朝講陛下即未能盡復其舊或五日一舉或十日一舉稍省虛文使聖躬不至厭倦孰曰不宜乎或以午朝或以晚朝預為傳宣惟聖意所在孰曰不宜乎或御便殿時召輔臣從容咨訪相與經畫天下人心豈不警策萬倍乎所謂用諫臣非謂建言諸臣皆君子而無小人參於其間也夫

天下固有沽名釣譽之小人而必無同流合汙之君子
故諸臣未必皆真而真者出於其中陛下容吏部從一
時之望精人倫之選擢而用之豈不彰天地無心之化
帝王從諫之美今必使秉銓者畏罪不敢推貶謫者以
官為禁錮是使賢不肖皆無由顯見而天下後世謂聖
人之朝以言為禁如聖德何夫安居以享榮貴自守以
待遷除豈非人情所甚便諸臣明知其不利於己而必
慷慨論列者無他其一念忠君愛國之誠激於中而有

不能自己耳為人子諫於父母逢父母之怒至於笞撻
及其事定之後父母未有不思其言而矜其情者臣固
知陛下於諸臣必有如父母之於子者矣所謂發內帑
臣非欲陛下盡損內廷之積為天下之用也臣觀古今
善理財者無如周公而周官所立泉府謂之曰泉者欲
其如泉之流而不滯也記曰有財此有用故財用相因
善用之則為治平之道不用則為無益之物臣以為宜
許戶部得以通融出入有事則暫借為邊方之用不致

天下急賦歛而激生他變無事則仍補還原數以備不時之需既明示天下以天子無私財而實則府庫之財未有非其財者也天下之事可言者不止於是而四者其要機伏惟聖明留意臣愚不勝惓惓以上二者為今日第一要務而聖心尤為根本必如是則天心格而天下可無水旱之災民心悅而率土益堅尊親之戴陛下試行臣言將見朞月之間萬事改觀邊方將吏勇氣百倍何憂疆圉之不靖哉不然則上下之情日隔天下之

心日離臣恐可虞之事不獨在叛軍彊敵海島不測之
夷而又有不可知者矣伏願陛下擴天覆地載之弘仁
垂日照月臨之精鑑慨然而俞之毅然而行之赫傳聖
諭示清秋朝講之期再下吏戶二部議行臣說使百官
萬民窮年累月之望一旦易為歡騰踊躍之情無論其
他即此中外之人情亦足以感皇天而丕變四海矣

聖明亟垂軫恤疏

天啓元年為光祿寺寺丞擬
因臺臣李公疏先上得旨允

行遂
止

臣三十年前官行人司行人曾於嚴寒見窮民赤體行乞者不勝悚惕然間有之而已今蒙聖恩擢用再至京師則窮民赤體者徧滿街衢矣每近日暮皇城左右哀號之聲悲慘萬狀臣往來過之目不忍視耳不忍聞痛心刺腸眠食俱惡臣日在東門恭進陛下膳羞慨然歎曰滿目窮民不過費陛下一朝之享而足也昔齊景公時天大雨雪景公衣狐白之裘臨朝而曰不寒晏嬰進曰古之賢君飽而念飢暖而念寒景公悟脫裘發粟以

與飢寒者夫景公一國諸侯能行一善名昭千古况我
皇上神聖何善不能為在一舉念間耳景泰中本寺寺
丞王鍾奏東安門外夾道中日有窮民跪拜乞錢四闕
無處無之遇寒洎必有凍死乞救戶部等衙門勘審人
給布衣一身米一斗審其原籍有親戚者待明年春暖
沿途給與口糧遞送還家其無親戚者在京以沒官房
給之仍行天下有司遇有窮民一體矜恤得旨戶部議
行成化時禮部尚書姚夔奏乞特敕巡街御史督五城

兵馬拘審道途乞丐殘疾之人有家者責親隣收管無家者收入養濟院照例給薪米其外来者亦暫收之候和暖量與行糧送還原籍有司一體存恤務令得所此亦調攝和氣之一端也憲宗可其奏曰無問老幼男女有無家及外来者順天府尹盡數收入養濟院記名設法養贍無令失所萬曆四十年本寺少卿徐必達疏內有請恤窮民一款云文王哀先茆獨阿衡恥一夫不獲奈何令輦轂下有此邇之不能遠於何有又言操臣丁

賓署南光祿時清理南京飯堂籍闔城飢民姓名逐坊約期給以錢米具受實惠况六飛親御之地何乃獨屯其膏請敕令各城御史照二臣題准行兵馬司按坊按鋪備核各飢民給以火烙印牌戶部出米御史按牌親給夜則查空閒官房分編字號亦按牌投宿其法甚善惜此疏留中不行臣謂此一舉也王政所必不容已况陛下一元伊始萬壽方新今萬國執玉九夷貢琛而令赤子寒無一縷赤身立骨輾轉於塗泥之中叫號於風

雪之夜豈盛世光景可使四海九州萬目萬耳聞且見乎臣隱度之此類窮民多不過千餘目前最急者當人與絮衣一身米一斗戶工部百孔千瘡之時決不能及此合宜於本寺預借庫銀四百兩倉米一百石且為千人卒歲之計容本寺臣涂喬遷等會同巡視科道清查應節省錢糧上請陛下允行補還此數可以不費陛下纖毫而增聖德無量如不以臣言為謬立發本寺庫銀四百兩倉米一百石委本寺堂上官一員督精敏署官製

衣仍設法隨米給散務令人受實惠此係權宜後不可
為例更乞敕下戶工二部如景泰成化間王鍾姚夔題
准事例及萬厯間徐必達題請事理立為可久之制其
於導和迎祥豈曰小補

破格用人疏

天啓二年為光祿寺
少卿工得旨允行

臣觀今日之事大不可測也敵人長驅與否不可測也
山海關能堅守與否不可測也各邊口保無疎虞與否
不可測也西敵保無乘虛與否不可測也而我所以備

之者泛泛然日復一日無一可見之實事則有坐待危亡而已非常之時豈當守尋常之格臣以為宜特設一防禦大臣專理守戰招豪傑如協理詹事府事禮部右侍郎孫承宗其選也臣不識承宗見其言論忠義懇切絕無瞻避詢之賢士大夫皆謂豪傑之士有為之才又素留心兵事果其用之當以學士兼尚書都御史職銜如在外總督之任於京師開府行事與部院名位相並職事相通庶幾行無窒礙更別發帑金數萬令其修舉

庶務不至支用各部擔延日月近奉旨練兵教射之董
應舉舊奉旨製造軍需之李之藻皆當加以職銜協佐
承宗此要著也夫守京師非獨於京師也四輔八府中
州近地自巡撫各道至各府州縣皆須得人今大計之
後豈其有不職者顧或資性與武事素不相習亟宜遷
以善地別選異才布滿畿地無事則練兵積穀有事則
率兵勤王此要著也守禦之道以人心為本民不知義
見難爭避不可守也無賴惡少瞥起搶劫不可守也姦

細伏匿乘危竊發不可守也治之之法無踰保甲諸臣
既詳言之皇上既申命之矣然行之存乎其人責府縣
行不能也責五城御史行不暇也當專任一人行一事
巷至戶到巡行稽察教以忠義旌其良善精擇壯丁使
習騎射如兵部職方主事鹿善繼可任也臣嘗一識其
人剛毅清約真實任事須以本部郎中帶御史職銜令
與五城御史事權相並與府縣職事相攝方便振行法
紀支取用度此要著也國家之事束縛於格套分歧於

意見搖奪於議論所從來矣雖以聖明之朝無事不可為而有志之士無事可為者大率坐此今日何日尚可循沿積習乎臣以腐儒越庖言事罪以出位夫復何辭伏望皇上行臣之言仍治臣之罪臣之願也

釋羣疑銷隱禍疏

天啓二年為光祿寺少卿上報聞

臣觀今日中外人心皆疑戚畹鄭氏并及其昔日所用之人以為敵人姦細伏陛下宮中一朝兵臨於外姦發於內其禍有不可言臣從田間久聞此語今來都下人

言更甚通國危疑莫必其命近且流言入於大內矣臣
伏而思之人言何為而然耶往者張差謀逆實係鄭國
泰主謀差之供招具在劉保謀逆實係盧受通謀劉于
簡供招具在受亦鄭氏之人不可掩也則人言洵洵有
自来矣然臣以為祖宗功德甚厚陛下福祚方隆天地
鬼神森列擁護故張差劉保先後伏誅凡謀者必敗
者必誅即天下至愚不應復萌此念况鄭養性等蒙三
朝不殺之恩正保守富貴之日豈復更有邪謀而無奈

人心之積疑不解也人心與國勢相為存亡人心疑則懼懼則易動而不可固雖有高城深池堅甲利兵其何以守臣以姦細之說不必論其事之有無當思所以處之之道不過從人心所積疑者而解之非以害之正使之遠害以自全也故在鄭養性自為計不宜以人所共指之人自處危疑陛下為養性計不宜以人所共疑之人密邇禁近亟當使歸湖廣原籍仍令帶俸以示優厚者也至於李如楨一家交關鄭氏計陷名將殺百萬軍

民失千里土地禍延至今皆其兄弟所為劉子簡原招
明言李永芳約如楨內應陛下不誅如楨直是養虎遺
患所當亟正典刑以除禍本者也至於崔文昇者當先
帝新喪哀痛萬幾勞瘁凡有疾病其證必虛雖至庸醫
亦能辨之文昇故以泄藥元氣一泄不可復收是明以
藥弑也在律故違本方殺平人者皆斬况於至尊乎陛
下不即誅夷僅止斥逐四海人心已憤鬱不平今文昇
復潛住京師意欲何為亟當明正典刑以全陛下父子

至情示天下君臣大義者也蓋文昇素為鄭氏腹心特
當時失刑不及考訊故不如張差劉保早正謀逆之罪
其罪豈在張差劉保下乎天下事當其可為則絲綸出
納而有餘當其不可為則斧斨破缺而不足今事急矣
伏望陛下立賜乾斷將鄭養性一家發回原籍將李如
楨崔文昇即正典刑則人心之危疑可釋肘腋之隱禍
可銷國家之紀法一明天下之神氣一振然後戰守之
事次第可行也事關安危大計臣下皆可直言臣不敢

辭出位之罪

恭陳聖明務學之要疏

天啓二年為太常寺少卿上得旨罰俸一年

臣觀帝王之德惟明而已惟其明也天下誦之曰明明后雖以堯舜之聖不過明其峻德為明明后也故明明后者必明明德明德者何也人之心也人心本明有不明者何也心本明又須人自明之故放於外則不明復於身則明著於欲則不明循於理則明動於氣則不明安於止則明荒於怠則不明居於敬則明騫於動則不

明主於靜則明其明與不明在一念轉移間如反覆掌
無難也今陛下臨朝百官肅肅於下陛下肅肅於上陛
下之心無不明也陛下臨祭百執事肅肅於庭陛下肅
肅於位陛下之心無不明也然而未為明也何者朝祭
之頃陛下之心無不明陛下不自知其明也必反而思
曰此時心中不著一事豈非心無為以守至正乎是所
謂心復於身也循於理也安於止也居於敬也主於靜
也是所謂不放於外不著於欲不動於氣不荒於怠不

驚於動也故曰思則得之不思則不得得者知吾心之
明本來如是非由人為造作也然後陛下知吾心之無
外即天也吾心之有主即上帝也故曰上帝臨汝無貳
爾心故曰小心翼翼昭事上帝此心一刻放失即貳其
心非所以事上帝矣夫然後深宮之中得肆之地雖欲
不凜然保之不可得矣至於深宮之中得肆之地凜然
保之而後為明明德也夫然後陛下讀聖賢書知無一
字不言心無一字不言心之明而津津有味焉至津津

有味於書而此心之保不難矣自昔聖帝明王未有不
好讀書者人主好讀書未有不為賢君令主者人心易
放而難操舍讀書別無操之之道如大學一書既講於
經筵入於聖慮臣以為即此書反覆玩味明明德於天
下裕如矣推而廣之宋臣真德秀大學衍義不可不讀
也再推而廣之先臣丘濬大學衍義補不可不讀也陛
下盡心於三書而帝王心法治法無不具備夫然後知
若何行政若何用人若何理財若何治兵人臣若何為

正若何為邪臣下之言若何為是若何為非若何為似
正而實邪若何為似是而實非皆了然於聖心而後為
明明德而後為明明后也如近日禮部尚書孫慎行論
舊輔臣方從哲一疏關係甚大隄防甚遠從哲之罪非
止紅丸其最大者乃在交結鄭國泰國泰父子所以謀
先帝者不一始以張差之梃繼以美姝之進終於文昇
之樂而從哲力左右之培植其為鄭者鋤擊其不為鄭
者一時若狂知有鄭氏而已此賊臣也討賊則為陛下

之孝而說者乃曰為先帝隱諱則為孝此大亂之道也
不可不明也又如戎政尚書黃克纘論選侍一事陛下
念聖母則宣選侍之罪念皇考則優選侍之禮義之盡
也仁之至也而說者乃曰為聖母隱諱則為孝明如聖
諭以為假捏忠如楊漣以為居功人臣避居功甘居罪
君父有急冷眼旁觀此大亂之道也不可不明也一惑
其說孝也不知其為孝不孝也以為大孝忠也不知其
為忠不忠也以為大忠忠孝大節皆可反黑為白何事

不可指鹿為馬昔宋朝欲貶蔡確嶺表宰執恐開端朱
熹歎曰使後世見無禮於君拱手坐視而不敢逐必此
言矣今務隱諱而已將何所不至哉事有不辨於至微
貽禍於無窮者皆若此類在陛下多讀書精義理此心
常明自能辨之果其辨之則如方從哲鄭養性大義豈
容不討何可一日復令居輦轂下耶臣蒙陛下擢於廢
棄玷於朝班八閱月矣伏見陛下真有為堯為舜之資
天下真可被為唐為虞之福而禍亂未已治平未臻羣

臣之言鉅細畢具然舉而措之在陛下一人所以回天地之運握宇宙之樞提挈綱維兼總條貫又在陛下一心不然如無舵之舟無鍼之車何所執持何所適從乎臣故舉要言之必讀書以明理明理以明心明心以出治始可弘濟於艱難建中興之大業也臣非迂言四十年體驗於身心考究於經史信其理之必然食芹而美曝日而溫以獻至尊臣老矣不能久事陛下不敢不畢其所欲言伏惟聖明少垂察焉

辭免重任疏

天啓四年為刑部侍郎
上得旨令遵新命供職

臣聞命而驚俯躬而媿臣嘗讀易曰德薄而位尊知小
而謀大力小而任重鮮不及矣臣蒙聖恩拔擢貳於秋
官自揣逾分方切循牆况於都御史者天下之事皆得
而言之臣工之邪皆得而糾之然而世習之漸靡難言
矣臣子不真心為國家不真心修職業悠悠忽忽則有
難振之氣以請託為固然以貨賂相結納則有難洗之
習升遷壅滯仰屋書空則有難定之志謬同異為是非

誤愛憎為好惡則有難清之見無端而起畛域藩籬無
端而起弓蛇鬼豕則有難調之情所以難者皆緣人心
各有陰私故各成隔礙必居此位者自心先無陰私而
後可潛銷人之陰私自心先無隔礙而後可潛通人之
隔礙至於御史簪筆朝端公論之明晦由之持斧寓內
一方之安危由之必為之長者聯為一體萃為一心惟
君國之是殉毋身家之苟營而後可弘濟於艱難今者
大計在邇巡方之使當使循良之麟鳳悉耀光明貪殘

之豺虎皆投有北庶幾困窮之四海災荒之孑遺尚獲少延喘息不然御史之失職即都御史之失職此之關係何如重大乃以臣之薄劣當之是易所謂覆餗者也况英賢滿朝以臣視人真皆勝己以臣自視真不如人伏乞聖明亟收新命任臣舊職別選賢能以當茲選

糾劾貪污御史

天啓四年為都察院左都御史上得旨允行

臣惟御史回道考察憲網至嚴也列聖之明旨皇上之申飭蓋諄復鄭重矣乃不意有慢視憲規恣行無忌如

巡按淮揚御史崔呈秀者陛下不以臣為不肖使長西臺豈非欲其是則是非則非無所媿阿隱默乎臣初入院適見有兩御史回道一為江西巡按御史謝文錦一為崔呈秀臣心訝曰異哉兩御史一時回道一至清一至濁涇渭較然臣不別白為陛下明言之是不忠之大者也即發河南道考核無何河南道御史袁化中以所考核謝文錦者至臣即以稱職考奉旨回道訖越二旬而化中始以所考核呈秀者至化中蓋有難於言者矣

臣於去年奉差而出今年復命而入往來淮揚間所見
淮揚士民無不謂自來巡方御史未嘗有如呈秀之貪
汙者強盜地方大害也每名得賄三千金輒放訪犯地
方大惡也每名得賄千金輒放不肖有司應劾者多以
賄免不應薦者多以賄薦至御史出巡每有節省公費
助國用者呈秀到處透支至一萬四千兩各縣賠補不
勝其苦彰彰於地方耳目臣時以非職掌所關不敢訪
其主名何人過付何人至於舉劾失真貪酷漏網則有

兩淮運司同知談天相在是呈秀所薦也呈秀甫離地
方而鹽臣樊尚燦按臣劉大綬且臚其贓私入告矣則
又有霍丘知縣鄭延祚在是呈秀所薦也吏科都給事
中魏大中且發其餽遺奉旨提問矣是賄而薦之實證
也臣嘗竊笑人臣之負國又自負也受國家寵榮若何
而所為者不務於可榮皆蹈於至辱御史巡方寵榮極
矣如呈秀者辱身辱國何如哉臣聞其知談天相之貪
欲論劾也天相稔其易與奉之以千金求免劾而卒免

天相益稔其易與也又奉之以千金求薦而卒薦則是
搖山撼岳之威祇供其禦貨攫金之用而墻間壟斷之
賤且冒居觸邪指佞之官臣故謂其至辱所當重處以
一洗巡方之辱者也伏祈皇上敕下吏部議覆施行

申嚴憲約責成州縣疏

擬未上

臣觀天下之治端本澄源必自上而率下奉法守職必
自下而奉上故朝廷膏澤至州縣始致之民州縣者奉
法守職之權輿也州縣賢則民安州縣不賢則民不安

顧天下之為州者凡二百二十有一為縣者凡一千一百六十有六豈能盡得賢者而用之賢者視君為天不敢欺也視民為子不忍傷也奉法修職出於心所不容已非有所為也其次則有所慕而勉於為善有所畏而不敢為不善其下則不知職業為何事法度為何物恣其欲而已是民之賊也故為政者拔才賢除民賊約中人天下惟中人為多約之於法皆不失為賢者太守約州縣者也司道約府州縣者也撫按無所不約約之使

人人守法如農之有畔焉而無越思則天下治矣臣謹
條畫州縣所當持行者令自撫按而下以遞相約皇上
不以臣言為謬謂可施行仍乞天語申敕令臣等刊刻
成書發各差御史頒行天下臣等按以覈天下州守縣
令并以覈約州州守縣令者庶幾皇上之仁恩得實究之
民也謹列欸如左

一課農桑須中心誠懇欲開民衣食之源賞勤警惰
使民興起毋得徒事虛文差人下鄉反滋民害

一興教化教化自身而出非以彌文故曰民不從其
令而從其好為人上者敬以持身廉以勵操肅以
御下民自觀而化之更須彰善瘴惡樹之風聲孝
子順孫義夫節婦必表揚之鄉紳耆德必尊禮之
邑中經明行修令譽著聞者必稽考其實聞之巡
按御史疏薦於朝以補鄉舉里選之廢典而不孝
不悌及一切闕人倫傷風俗者必寘之法如是久
之而教化自興

一育人才朔望臨學宮必以聖賢明訓為諸生諄切
教誨俊秀之士必令讀四書五經小學近思錄性
理綱目以端其心術正其識見為國家有用之才
一鄉約為教化內一要事但縣官不以誠心行之徒
成虛文而約正約副等反為民害果有力行者必
敦請邑中德行鄉紳或孝廉貢士為民欽服者主
其事而約正副等以供奔走鄉約行則一鄉之善
惡無所逃盜息民安風移俗易皆得之於此有記

善簿記惡簿又須有改過簿許令自新

一鄉飲鉅典不得濫及匪人

一社學務選教讀得人

一學宮敝壞即申詳修理境內凡有古先聖賢及祀典所載山川祠宇敝壞者即時修理完好者仍要埽除潔淨闕鎖祠門不得容人堆積雜物坐臥作踐四方過客瞻拜有識者常以此占州縣官之品何可忽也

一積貯民之大命豐無所儲荒無所賑尚可稱民父母乎必須隨宜設法使一縣積穀足備一縣賑濟豈獨活民即以弭亂州縣之功在蒼赤慶流子孫端係於此

一社倉是救荒良法各鄉勸耆紳及名家自造倉廩自放自收不可以官府與之其法量人戶種田多少人口多少以二分息於青黃不接時借貸又必二三十戶連名保借欠者即同保內人戶攤賠小

荒減利中荒捐利大荒連本米下熟徵催官府給
與印信文簿為究治奸頑使之可久

一境內有荒蕪田土宜竭力開墾流移人民宜竭力
招撫

一境內有陂池宜浚者及時開浚圩岸宜築者及時
脩築城垣頽塌橋梁毀壞者及時整理高原汙下
所宜樹木及時種植

一倉穀主守須擇殷富謹厚者量以禮待每年交盤

更換勿令偏累傾家但令接管者照數交收勿令
吏書參與以滋需索及時斂散出陳易新皆縣官
躬親

一養濟院近來竟成弊藪獨不需實惠皆由吏胥
添捏詭名混冒須是州縣官據其陳告者審實給
以面貌木牌仍不時查核分別革留凡男婦犯重
罪或游蕩傾家及有子孫壻姪可養者不得混收
以妨無告

一州縣極貧待斃之民大約可計每歲動支預備倉穀城中四門擇寺觀寬綽者煮粥每人米五合即可苟延殘喘自十月十五日起正月十五日止孤老有糧不許混冒約費米百餘石耳設誠行之利濟不少所當委任得人稽查出納無成虛文

一錢糧一縣大事秋冬之交必先算定分派由帖使小民先知辦納之數徵糧則總立一簿算定人戶額田數田糧數均徭里甲條編數分為十限每月

限完幾分比較只用此簿不得別立第二簿完欠俱用實寫不得用浮票民間依限完者即不聽比過限不完方拘其尤者比責須是分數明白如欠一兩而從來未完者即從重究欠十兩而完過七八分存剩者即從寬處毋得但論多寡而不分全欠零欠之別催徵止用里甲間於奸頑之戶行不測之威票拏一二無得徧差阜快執牌下鄉徒空雞犬無益繭絲

一徵銀不加火耗即頌聲徧地此亦易事何海內寥寥信矣立志高遠者之難所宜猛省

一收銀要不時取收頭法馬等子查對令解戶親自敲鍼

一起解銀兩須委佐貳不得用窮官猾吏以致失事
一天下庫藏未有不為庫吏書侵欺者查盤時那借支吾非其實也必須訪的監禁即時變產完納者貸其死不完者即申上司置之法一應收放掌印

官纖悉自封自判勿復入其手

一無情之詞十無一實縣官貪取贖罪輒多准詞狀
致原被兩家同歸於盡民之窮困此其一端為民
父母當肫切勸化令勿輕訟事涉倫理而無大故
者即為焚其狀詞免其仇隙其他苟無關係槩勿
聽可也

一人命狀詞尤不可輕准出牌在城告人命者縣官
即至其家相驗審問四隣証告者重懲情真者方

准在鄉者必令帶尸到壇帶四隣到尸所然後投
狀縣官即到壇中相驗審問一如在城之法則不
真者自不敢輕告非但官省事民保家以人命詐
人者亦息老楫之獲全其命者多矣

一佐貳不得令擅受民詞擅出牌票衙役尤宜箝束
佐貳之害民即令之害民也

一勾攝止差里長非真正強盜人命巨惡不得濫差
阜快下鄉以滋詐擾是造福小民第一義

一本縣人不得容棍徒在別縣赴告除強盜外闖提者勿聽

一婦人非犯姦及人命及被公婆夫男所訟俱不許拘

一輕犯罪人勿得輕送監鋪致染瘟疫及為牢頭索詐婦人不係大辟及勘合追贓家屬雖娼婦亦勿濫禁

一罪犯除大辟及引例充軍外其祖父母父母老疾

家無次丁者照大明會典發本州縣擺站做工煎鹽哨瞭在京無論軍民發兩京府會同館擺站各照徒流年滿釋放此刑罰中仁恩不可廢而不行也

一獄中重囚日間寬鬆夜間當嚴禁獄門不得容人出入常以不測查點

一吏書門卑賤之縱之皆縣令也衆胥役分其利一縣令受其名愚者不為往往愚而不悟何也所宜

猛省

一善人者一方元氣民間有孝子悌弟其上矣次則仗義好施者次則終身自守不作非為者必須訪實各書所長扁額表其門免其雜泛差役以為民勸

一惡人者良民蝨賊蝨賊去而良民始安凡天罡地煞打降把棍之類訪其首惡重治仍籍之於官使禁其黨類一有黨類詐害良民者并其首治之

一訟師教唆起滅破民家壞民俗一段機械變詐無識者競以為能浸淫入於其術而不覺不復顧天理人心為何物矣所當訪實悉榜其名於申明亭審出刁誣詞狀追究寫狀之人并拏重治

一豪奴倚主人之勢魚肉小民莫可控訴訪實惡端申巡按御史拏治

一刑杖竹篔不得重一斤務要削平稜節不許打在一處不許打腿灣拶指不得過兩時非強盜人命

不許輕用夾棍夾不得過兩時敲杖不得過三十
一堂上須要肅清不得容吏書阜快門役擁立左右
致姦弊出於意外

一每日所行事須立一簿逐件登記完者勾之一月
內事必於一月內了使吏書不得延捱索詐上司
事亦不至沉閣取咎

一私衙要關防嚴密多有清謹官為妻子僮僕親戚
所壞交通衙役私出官票暗騙民財時宜覺察

一縣官鄉里親戚不得容留在寺院說事得財以速
官謗

一本縣每日供給須照時價給現銀與市民兩平易
買不得倚官減值虧短賒欠不得縱容買辦人索
取鋪行錢物佐貳衙一并禁戢

一各役工食按季放給不得預放扣減

一生辰令節不得受禮物以長奔競

一不得假借巡緝查點將不到人役科罰銀穀

一不得稱貸富室及至富室監生家飲宴

一上司鋪陳往往借用當舖江南則派糧長借辦極為擾害須本縣節省公用置辦著庫吏收領封貯入查盤事件內無令移用以至缺少

一俵解備用馬匹不得剋減馬價

一保甲所以弭盜安民今本縣開報保長時既饜飽吏胥一番而棍徒充當保長又詐害良民無已竟使善法皆成厲政團練鄉兵亦然徒滋擾害而已

既不可懲噎而廢食豈可不循名而責實要在賢者著實舉行周密防備天下多事之時二者實為未雨綢繆之計不可忽也

一武備不但地方保衛亦官府自身保衛昔人作縣猝遇大盜詐作承差突入縣庭拔刀劫庫縣官給以庫銀大錠不堪發用為批票取之大戶所僉大戶皆民壯之驍勇者諸人知令有急皆襁塼石而入遂擒羣盜使非掄選平時安能應變倉卒故據

各州縣民壯弓兵汰其老弱實其虛冒儘足以募壯士練精兵備不虞也

一盜賊地方大害必有窩家必與捕快交通平日當密訪窩家及通盜捕快置之於法一有生發即行嚴捕必擒獲而後已此等風采彰聞自然盜賊屏息乃不肖有司護盜如子既欲邀盜息民安之譽又避上司地方多盜之責往往深怒失主呈告反責捕快詐誣其甚者與盜相通納其貨賄致盜賊

以此縣便於行劫縱橫無忌失主不敢告捕快不敢擒釀成大亂恒必由之所當痛以為戒

一強竊盜到官縣官即刻自審勿輕用刑只嚴急起賊賊真然後具招勿輕信扳誣而容捕快先拷勿先發佐貳審問

一賭博為盜賊之源必須嚴禁民間開場賭博者責令兩鄰首告不首者同罪

一娼家為盜賊之藪不許容留城內居住有居住者

兩鄰不首同罪

一白蓮無為等教自古倡亂之首務要密察訪嚴驅逐無致遺害地方

一州縣官表率一方宜先簡儉以挽侈靡之俗即宴會名刺不可以為小事漫從流俗當照憲規刊刻小約與本地搢紳彼此遵行節財用於易忽移風俗於不覺矣

一民間滄殺子女最傷天地之和有犯者重治四鄰

不首者同罪

一宰殺耕牛粘網飛鳥當設法嚴禁亦仁政之一端
近江南有以鳥銃射彈飛鳥一發輒斃多命尤為
殘忍所當嚴禁

自請罷斥疏 得旨回籍

臣於本月初八日奉旨會同吏部尚書趙南星看議御
史陳九疇論新推山西巡撫謝應祥及文選司員外夏
嘉遇與九疇互相奏辦事隨具疏上聞十二日奉嚴旨

處分矣夫應祥之推巡撫出家臣真見以為他人遇缺
干求應祥恬靜自守欲以此獎勸恬士故與夏嘉遇言
之而特用應祥會官推舉衆論僉同已蒙皇上點用不
謂陳九疇謂其昏耄謂其圖謀乃以誣不要錢不說事
之吏科都給事中魏大中天地神明昭布森列九疇
誤為人使以欺皇上臣則何敢欺皇上以欺天地神明
今大中嘉遇俱已降斥部院被含糊偏比委曲調停之
旨臣媿死無地自傷愚昧不能仰當聖心報皇上知過

之恩又傷煩言亂政致干聖怒虧皇上平明之理臣諫
臣之長以諫為職當有顯諫顧伏而思之臣之事君如子
事父母父母有怒為子者當夔夔齋慄待親心之自明
親怒之自霽何可更為激瀆臣又伏而思之九疇疏中
有背公植黨之語前代往往以黨之一字空善類傾人
國亦由當時大臣過激以速成其禍今日何可別為激
瀆然而臣之職失矣官以諫為職而失其職則皇上何
取失職之臣為哉伏乞即將臣罷斥以為人臣不盡其

職者之戒

遺疏

臣雖削奪舊係大臣大臣受辱則辱國故北向叩頭從
屈平之遺則君恩未報結願來生臣高攀龍垂絕書乞
使者執此報皇上

揭

罷商稅揭

伏見天津撫臺李懋明老先生疏內有復商稅一款攀

龍不覺頓足歎曰何意斯言發於賢者夫神祖朝羣臣
敝舌禿穎請罷稅而不可得光考一朝罷之海內歡呼
有若更生光考一月仁政千秋令名此事最大夫罷而
歡呼則復而怨咨歡呼而誦光考之仁聖則怨咨而謂
皇上為何如主耶此一事耳皇上子道所關君道所關
今日與人之口即他年信史之筆人臣縱不畏一身受
譏讒獨不畏君父蒙譏議乎此而不畏則王安石之人
言不足恤矣今日定亂以人心為本舉朝方惴惴憂加

派之失人心而商稅之失人心倍蓰於加派加派之害以歲計商稅之害以日計商稅非困商也因民也商以貴賈決不賤賣民間物物皆貴皆由商算稅錢今稅撤而價不減者實由鑛稅流禍四海困窮加以水旱頻仍干戈載道稅撤而物且踊貴况稅復而寧知底極乎兵興以來言利者細無不舉無一足恃實非策也鈔關當舖皆令民怨而天怒反致悖入而悖出以奪民之財非生財之道也生財之道生之節之兩端而已試觀二祖

開基軍國浩費曾有今日之諸款乎曾有今日之不足乎不過屯田鹽法錢鈔等事行之得宜耳宋仁宗用師西夏命近臣及三司議省浮費詔自乘輿服御及宮掖所須務從簡約若吏兵祿賜毋得輒行裁減治朝生財如此今生之不能遽生節之不肯遽節目前急著在天
下巡撫得人使其隨地相機隨宜措置每年務設處若干以佐國用豈遂不及復稅所得之數乎以此俟屯田之成外患之弭庶幾其可商稅一事言之痛心萬望李

老先生前念皇考後念皇上慎勿以復稅為念同朝諸
老先生慎勿以復稅為言也謹揭

論學揭

近者黃門朱五吉老先生有憲臣議開講學之壇國家
慮啓門戶之漸一疏指意歸重東林至欲以東林為戒
而不復講學此說一倡吾道之禍大矣天下國家之禍
大矣職東林人也即不言及於職何忍坐受東林之誣
正欲具疏旋奉明旨如日中天不復瀆奏以啓爭端故

謹具揭夫黃門所言東林非東林也乃攻東林者之言也所言東林之禍非東林能禍人乃攻東林者欲禍東林也數年來職每自詫理義人心同然何以言理義者輒目為朋黨而不容於世乎一日憬然曰正惟其同然也故以為黨也國家用一當用行一當行去一當去必曰是東林之脈也或有人言一當用言一當行言一當去必曰是東林之人也不論東西南北風馬牛不相及之人苟出於正目為一黨東林何幸而合天下之眾正

何不幸而受天下之羣猜弓蛇石虎塗豕鬼車皆非實事也即如郭明龍正域生平未嘗講學生平不識東林黃門謂與顧憲成開講東林即此而觀他可例推無亦黃門師生姻婭之間涵濡浸灌之久於時局之說不自覺其入之之深乎不然何以二三年來門戶去於人口依然還作當年口吻耶夫時局何為而攻東林耶方中涵相國未入相之前首叅之者吳巖所亮也既入相之後首叅之者錢梅谷春也故一時承迎相國者皆以攻

東林為職業摧殘善人戕害國脈率由於此此果東林所為乎抑攻東林者所為乎以為東林所為東林能制其鄉里言官不叅論人乎昔程伊川先生講學於熙豐而為蔡京諸人所攻朱晦菴先生講學於慶元而為韓侂胄諸人所攻不以蔡京韓侂胄諸人為戒而以伊川晦菴為戒可乎東林非程朱而習程朱之教者也不幸類是矣夫學者何也人之性也性者何也天之道也知道則刑名錢穀皆實事也不知道則禮樂刑政皆虛文

也在此心迷悟間耳諸老從迷得悟不忍人之覲面而迷故講以明之正使之即事為學非以學廢事也黃門曰孰是仕優者乎乃可學不然勿言學職亦曰孰是學優者乎乃可仕不然勿言仕審如是可仕者寡矣宇宙甚大不可以一見相礙釋老且不能廢况可廢儒儒者以明道者也非儒生帖括之謂也非督學膠鬲之事也收拾精神而非消耗精神者也不知學世道交喪於是朋黨禍起相安則交安相危則交危故黨類之黨不

能無是羣分之品也偏黨之黨不可有是亂亡之本也
知黨類之不能無使之各得其所而勿相猜忌知偏黨
之不可有使之各懲其禍而勿為己甚但得人人自反
勿專尤人則無不可融異為同化小為大故有教則無
類并黨類之黨亦可融之者其必由學乎惟學可消門
戶顧以學為立門戶職未見立門戶者而可以謂之曰
學也謹揭

問

解頭問

或問解頭之役曰江南自糧解而外解役之最重者有四一硃漆解也一茶蠟解也一皇埽解也一胖襖解也四者皆足以破民家而殺其身曰若是其甚與曰民趨役於三十里外而受命於宦豎宦豎之視富民虎之視肉也何厭之有曰然則將奈何曰民辦物官為解民厚出解網給之使解官有利無害斯善矣曰辦者非解者解者非辦者民競為粗惡以塗塞物不堪解而解官何


所呼號於輦轂之下也曰是有主者終無所遁其責民則何敢且物不具解官不行也曰解官挾不行之勢以漁民奈何曰解官有轄民有控何病曰主者為誰曰上富戶也次富為貼不及下富曰戶上下於何知之曰上富表表邑中不必以田知田有飛詭也次富以田知之差其多寡為等當事者平日當有一小冊差等富戶參伍咨訪周知四境以審糧役點解戶不洩於臨事不欺於胥吏矣曰吾聞役法莫不善於用貼譬之一牛駕一

犁牛未必憊一犁駕十羊羊斃而犁不舉矣曰貼有二貼役者雖釐毫亦同其不測之禍謂之以羊代牛可也貼錢者雖銖兩必有定派之額謂之衆擎易舉可也吾所謂貼貼錢而非貼役也曰其法如何曰一解役出則點幾上戶為主必其三年內無糧長等項重役者仍量其所費若干與貼戶若干貼戶出錢主者辦解物具而差官解官亦必擇其人之可任者即今候缺小吏窮困無聊如年度日民出錢以餼官官出力以惠民官民兩

利計莫善於此也曰費之多寡何以知之曰此須細詢
令經役而熟於事者詳開某件時價若何某件工價若
何此可以知解戶之費矣詳開沿途某費若何到京某
費若何此可以知解官之費矣解戶務在多與貼而不
困其力解官務令多與糈而不苦於行斯上下相便而可
久也每見往時民解既易官解官解旋復民解者非官
解之不可行解網儉而官稱厲也當其議官解時民不
勝吝即令微益於解官而不能平及其復民解時民又

不勝苦即欲厚輸於解官而不可得夫民可與樂成而不可慮始固在上之人力持而公裁也若曰官解終不可行則金花亦屬官解經收亦屬宦官何以人爭求之至今居間為也則以金花解網最饒故也曰官解既久宦豎知解網饒獨不窮索解官乎曰固也視民則有間矣解官有官差可憑有當路可告有地方仕宦可丐以宦豎及各衙門吏胥視之則雞肋也孰與富民先儒有言天下事未有有利而無害者擇其利多而害少者為之耳

抑愚復有慨焉今天下白糧獨出江南江南獨出七府
宮闈百官胥食之民出財力輦輸以供國家者獨當海
內勞苦而白糧船所至關津復稅之何耶今民貿易米
麥關津亦不加稅豈貢賦之米反當稅耶或曰非稅糧
稅私貨耳此又不仁之甚者也夫糧有定額船亦有定
額所帶幾何而不使勞民自潤乎此聖王之必宜聽而
不禁者也誠得當路特奏免之其錫福於民者無涯歟
福於身者亦無涯矣此則蘇民間糧解之最苦者也



高子遺書卷七